

每週經課朗誦經文(巴克禮台語漢字)2013/07/07

共同經課 - 1 列王記下五章一節~十四節

1 亞蘭王的軍長乃縵佇伊的主人的面前做大做尊貴，因為耶和華曾用伊互亞蘭得勝；伊也是大權能的勇士，總是癩疙(thái-ko)。2 前亞蘭人歸陣出去，對以色列地掠一個查某囡仔，伊就伺候乃縵的某。3 伊給伊的主母講：「苦袂得著我的主及撒瑪利亞的先知相及佇啲，伊的確會醫好伊的癩疙(thái-ko)4 有人入去給伊的主講，屬以色列地的查某囡仔按呢按呢講。5 亞蘭王講：「你去啊，我也欲寄一張批互以色列王。」乃縵就去，帶銀十他連得，金六千，衣裳十套；6 帶批到以色列王遐，批內講：「批到你遐的時，看啊，我差人臣乃縵去見你，你著醫好伊的癩疙(thái-ko)。」7 以色列王看批了，就拆裂伊的衫，講：「我豈是上帝，互人死，互人活嗎？此人竟然差人來我遮，教我醫好伊的癩疙(thái-ko)。請恁斟酌想，看此人怎樣尋縫攻擊我？」8 上帝的奴僕以利沙聽見以色列王拆裂伊的衫，就差人去見王，講：「你啥事拆裂衫啊？通互彼人到我遮，伊才知以色列中有先知。」9 乃縵就及伊的馬伊的車來倚佇以利沙的厝門口。10 以利沙差一個使者，給乃縵講：「你去約但河洗身軀七擺，你的肉就復原，你欲得著清氣。」11 乃縵就受氣退去，講：「我本拍算伊的確欲出來見我，倚啲求叫耶和華——伊的上帝的名，搖手佇患著的所在，來醫好癩疙(thái-ko)的。12 大馬色的河亞罷拿及法珥法豈無比以色列一切的水卡好嗎？我佇遐洗身軀袂得著清氣嗎？」就越轉身受氣做伊去。13 伊的奴僕進前，給伊講：「我的父啊，先知若教你去做一件大事，你豈無欲做嗎？何況伊干單給你講洗就清氣啊？」14 乃縵就落去，照上帝奴僕的話，佇約但河洗七擺；伊的肉復原，親像囡仔肉，伊就清氣。

共同經課 - 2 詩篇三十篇

1 〔此個詩是獻宮殿的歌，大衛做的。〕耶和華啊，我欲尊重你做至高，因為你曾提拔我，無互我的仇讎對我誇口。2 耶和華——我的上帝啊，我曾求叫你，你就醫好我。3 耶和華啊，你曾救我的靈魂對陰間起來，你互我活啲，免致入墓。4 耶和華聖的百姓啊，恁著唱歌嘔啲伊，記念伊的聖名來感謝伊。5 因為，伊的受氣不過目久；伊的恩典是一生的久，歸暝雖然有啼哭，早起時就有歡喜。6 論到我，我佇亨通的時，就講：我永袂搖拙。7 耶和華啊，你曾施恩，互我的山豎在堅固；你掩你的面，我就迫腹。8 耶和華啊，我求叫你；我對耶和華求恩，講：9 我流血，我入墓，有啥利益？塵埃豈會謳啲你，豈會報揚你的真實嗎？10 耶和華啊，求你聽我，憐憫我！耶和華啊，求你幫助我！11 你已經將我的啼哭變做跳舞，你將我的麻衫褪去，用歡喜給我繕，12 通互我的心神唱歌謳啲你，亦無靜靜。耶和華——我的上帝啊，我欲感謝你，到永遠！

共同經課 - 3 加拉太書六章一節~六節(七節~十六節)

1 兄弟啊，若有人無張持陷落罪過，恁屬佇神的人著用溫柔的心神歸正伊；也著家己關防驚了恁也抵著試。2 恁逐人的重擔著相共擔，用按呢，來盡基督的法。3 無，也家己掠做有的，是騙家己。4 逐人著省察家己的所行；就有通誇口的在佇本身，無在佇別人，5 因為逐人欲擔伊家己的擔。6 學習道理的，著將逐項好物互教示伊的相及有份。7 莫得家己錯誤，上帝袂侮慢得。因為人所撒的是甚麼，伊也欲收彼號。8 為著家己的肉體撒的，欲對肉體來收成敗壞；為著聖神撒的，欲對聖神來收成永活。9 咱行好，毋通失志；因為若無折站，到期會收成。10 所以，猶有機會咱著行好佇眾人，佇許個對信成做一家的人閣卡著致意。11 恁看我親手寫互恁的字到即大！12 見若愛用肉體妝飾好看的，in勉強恁受割禮，無毋是愛免得為著基督的十字架受窘逐。13 因為in受割禮，連家己也無守律法；獨獨愛恁受割禮，互in通佇恁的肉體誇口。14 若是我斷斷毋誇口別項，只有誇口咱的主耶穌基督的十字架若定；對此個，就世間向我釘十字架，我向世間也是按呢。15 因為受割禮無受割禮攏無要緊，要緊就是做新創造的人。16 見若照此個準繩來行的，願平安、憐憫到佇in，也到佇上帝以色列的百姓。

共同經課 - 4 路加福音十章一節~十一節，十六節二十節

1 諸個代誌了後，主閣設立七十人，一對一對差in做頭去伊所欲到逐個城，逐個所在，2 對in講：「通收成的是多，做工的是少。所以，恁著求園主迫工去給伊收成。3 恁去啊！我差恁，親像羊仔入豺狼的中間。4 莫得帶錢袋，莫得襪襪，莫得鞋；路裡莫得給人請安。5 無論入甚麼厝，著代先講：『願此家平安。』6 設使有合宜得著平安的人佇遐，就恁的平安會到佇伊；若無，就倒歸佇恁。7 著惦佇彼家，飲食in所供給的，因為做工人堪得得著伊的工錢；莫得對此家徙去彼家。8 無論入甚麼城，人若接納恁，著食in所排佇恁面前的。9 城內有病的著醫好in，續給in講：『上帝國近恁啦。』10 若是無論入甚麼城，人毋接納恁，就著出去in的大街路，講：11 『連恁的城的土粉住佇阮的腳的，阮也對恁拭去。總是恁著知上帝的國近啦。』16 聽恁的就是聽我；棄揀恁的就是棄揀我；棄揀我的就是棄揀差我的。』17 許個七十人倒轉來啲歡喜，講：「主啊！用你的名，鬼也降服阮。」18 耶穌給in講：「我有看見撒但，親像閃爍對天跋落來。19 我已經互恁有權通踏蛇及蠍仔蟲，閣贏過對敵攏總的氣力，決斷無一項會害著恁。20 總是，莫得因為諸個神降服恁來歡喜，著因為恁的名記佇天裡來歡喜。」